



## 阮阿公

阮阿公是一個無話無句的人。

阿公的古意是通人知，誠得人呵佬。阿媽個後頭就是恰意阿公的實在，才會共阿媽嫁予伊做某。阿媽是好額人的查某囝，年歲閣比阿公較大，古早人咧講：「娶某大姊，坐金交椅。」照理講阿公娶著某大姊是會共伊鬥扞家，嘛是加一个跤手通好鬥相共，毋過事實煞毋是按呢。

阿公厝內原本就散赤，雖然田裡的穡頭缺少，毋過彼當時田地猶未放領，猶原是愛交田租，閣再講作穡人看天食飯是食袂飽的。為著欲顧三頓，阿公趁田裡的工課較輕可的時陣，四界走從去揣穡頭來做。毋管是掘甘蔗、犁番薯抑是駛牛車替人載貨，啥物工課伊攏毋捌共人推辭過。阮阿媽嫁予阿公了後，厝內煮飯洗衫的工課，對一个跤尖手幼的查某人來講就已經足食力矣，哪閣有法度去田裡鬥跤手咧，所以田裡的工課攏著阿公一个人總貿，厝內底大大細細成十支喙欲食穿，攏著愛靠阿公一雙手，可見阿公的擔頭是佢爾仔重。

聽阿爸講，阿公為著欲分擔厝裡的擔頭，一个十二歲的囝仔疔，就綴人去做小工，替人犁田、拔番薯。雖然日子歹過，總也是一工一工過、一年一年度。阿爸講阿公攏毋捌怨嘆過，干焦喙齒根咬咧一直拚，共食苦當做食補，恬恬仔做、無聲無說，逐家攏講阮阿公敢若是一隻戇牛咧。

阮阿公嘛是一個體貼的查埔人，伊早暗攏會捧面桶水予阿媽洗手面，嘛會替阿媽掙尿斗仔去摒。伊知影阿媽愛食粉粿，就會請粉粿伯仔替阿媽留一碗。自細漢到大漢，我毋捌看過阿公佇伊家己的身上開過一仙五厘，阿公的貼心恰勤儉，予我這個做孫的誠感動。尤其是佇「查埔人是天，查某人是地」的舊思想年代，阿公甘願身軀放落軟，毋驚別人講閒仔話，甘願為家己所愛的人付出，彼是一件真無簡單的代誌。我真欣羨阿公對阿媽彼份疼痛的心，會當嫁予阿公，阿媽真正是世界上上蓋有福氣的人啦。

作者：洪媛麗

### ☆詞彙學習☆

【無話無句】bô-uē-bô-kù：沉默寡言。

【扞家】huānn-ke：主持家務，養家活口。

【輕可】khin-khó：輕鬆。

【走從】tsáu-tsông：奔波忙碌。

【跤尖手幼】kha-tsiam-tshiú-iù：細皮嫩肉、玉手纖纖。

【總貿】tsóng-bāu：全部包攬下來。

【小工】sió-kang：指一般打零工的人，因其工作性質、內容均不定，有時亦為副手，故稱為小工。

【疼痛】thiānn-thàng：疼愛、關切憐惜。